



Bidze 2023 Revi Milye Lannen
GOUVERNMAN SESEL

Delivre par:

VIS PREZIDAN LAREPIBLIK LO LAPAR
MINIS POUR FINANS, PLANIFIKASYON NASYONAL EK KOMERS

Dan Lasanble Nasyonal Sesel
Ile Du Port, Victoria, Mahe, Seychelles
Mardi 19 Septanm 2023
2.15 Apremidi

Msye Spiker

Onorab Lider Lopoziyon

Onorab Lider Zafer Gouvernman

Manm Onorab

Tou dimoun a lekout

Bonn Apremidi,

Msye Spiker, anlinny avek lartik 154 (6) Konstitisyon e Seksyon 30 anba Public Finance Management Act 2012, ozordi mon pe donn sa Lasanble en revi lo performans bidzeter pandan sa dernyen sis mwan pour lannen 2023, e prezant revizyon bidzeter pour sa lannen.

Lasanble Nasyonal in resevwar trwa dokiman, ki a permet zot swiv pli byen sa sesyon. Sa trwa dokiman i:

Premyerman -Mid-Year Economic and Fiscal Outlook

Dezyenm - Summary of Fiscal Outcome e

Trwazyenm - Details of additional funds and budget cut

Msye Spiker, pour lannen 2023, Lasanble ti aprouv en bidze SR 10,495,149,665. Pour sa premye sis mwan, lo kote nou performans fiskal nou'n atenn en sirplis fiskal primer SR 365.8 milyon ouswa 1.2 % GDP ki bokou pli byen ki nou prozeksyon pour sa premye sis mwan, ki ti en sirplis fiskal balans primer selman SR 15.4 milyon ouswa 0.1 % GDP. Sa, i vedir ki nou'n anmas plis reveni ki nou tin prevwar e nou'n osi depans mwens ki nou ti pe antisipe.

Msye Spiker parey nou kapab konstate, depans Gouvernman pandan premye sis mwan i toultan pli ba, par rapor avek depans pour dernyen sis mwan, e sa i en tandans ki persiste, me avek letan nou war ki bann Minister, Departman e lazans pe kapab amelyor zot prozeksyon, ki an retour i amelyor prozeksyon ki Departman Finans limenm i fer.

Msye Spiker, anba reveni total taks e non taks, nou pe prevwar en rediksyon SR 711.6 milyon konpare avek bidze inisyal. Sa rediksyon i prensipalman anba reveni taks.

Konpare avek Bidze inisyal pour 2023, reveni taks in ganny revize pli ba par apepre SR 789 milyon, ki ekivalan 8.6 pousan. Sa, i prensipalman akoz en baz pli ba pour taks in ganny servi dan previzyon. Sa i swivan defisit lavalier SR 394 milyon ki ti ganny rikorde a la fen lannen 2022.

Malgre en performans pli ba ki ti'n bidzete pour 2023, taks pour 2022 i pli o ki sa ki ti ganny rikorde pandan lannen 2021, par SR 671 milyon, ki vedir previzyon pou koleksyon taks i reste enn ki pozitiv e an linny avek kwasans ekonomik.

Msye Spiker, anba koleksyon non taks nou'n vwar en amelyorasyon par SR 77.6 milyon e sa i akoz pandan sa premye sis mwan 2023, serten laliny reveni anba sa kategori in perform pli byen. Par egzanp; Departman Imigrasyon, avek Departman Transpor.

Bann don ki nou resevwar in redwir par SR 35.5 milyon. Nou vwar ki i annan serten don ki pa pou ganny materyalize sa lannen, par egzanp Konstriksyon Fasilite Seksyon La Marinn anba Departman Lapolis ki pa pou konmanse sa lannen, e osi proze pour nouvo sistenm "Invoice Management" anba SRC.

Msye Spiker, par kont nou osi vwar bann nouvo don ki pa ti dan nou prozeksyon initial. Par egzanp, devlopman semen dan rezyon Sid-Was Mahe.

Msye Spiker, Gouvernman ti'n prevwar pou fer en sirplis fiskal primer SR 330.28 milyon rounpi ouswa 1.1 pousan nou Prodwi Domestik Brit (GDP), pour sa lannen. Pandan negosyasyon nouvo programm avek sipor Fon Moneter Enternasyonal (IMF) ki ti konplete an Mars 2023, nou ti fer en revi lo bann endikater makro ekonomik e osi nou'n prevwar en pozisyon fiskal negativ konpare avek sa sirplis inisyale. Sa i akoz Gouvernman in negosye lespas fiskal adisyonel pour li kapab investir plis dan lenfrastruktir pei dan sa ki nou apel 'medium term'.

Msye Spiker, baze lo revi milye lannen ki Minister Finans in fer ansanm avek tou lezot Minister, Departman e Lazans, Gouvernman in war ki i pou kapab redwir serten depans, fer enpe plis seving lo bann proze ouswa programm ki pa pou materyalize sa lannen ki pou fer nou kapab akonplir nou target fiskal.

Anba saler pour sa premye sis mwan, nou'n war en seving SR 64 milyon oubyen 4 pousan, sa i apre ki target ti ganny revize an Mars. Ankor enn fwa, bann Minister, Departman, ek Lazans pan'n reisir ranpli bann pozisyon travay ki zot ti annan lentansyon pran.

Prozeksyon saler pour sa dezyenm sis mwan in ganny revize pli ba, par SR 173.5 milyon rounpi, sa i akoz bann seving relye avek peyman trezyenm mwan saler, rekritman ki pan'n materyalize, e osi serten re alokasyon bidze anba laliny byen e servis dan serten Minister, Departman e Lazans, sa ki nou apel "Virement".

Msye Spiker, anba 'Goods and Services' nou ava apel li byen e servis pour sa premye sis mwan nou war en seving SR 93.2 milyon oubyen 6 pousan. Depans anba sa kategori, in reste pli-zou-mwen stab. Bann byen e servis in ganny revize par en adisyonel SR 106.78 milyon.

Lo kote bann proze kapital, Msye Spiker, pour sa premye sis mwan depans in reste relativman ba par rapor avek total bidze a 14.65 pousan, me si nou pou konpar total depans pour sa peryod par rapor

avek prozeksyon bidze pour sa menm peryod an 2022, nou war en ogmantasyon dan performans, par 64 pousan.

Tandans pour proze kapital se ki i bouz plis ver dezyenm parti lannen. Nou prozeksyon pour sa lannen anba sa laliny i en rediksyon SR 154.8 milyon, ki prensipalman relye avek bann proze dan form don e bann pret.

Msye Spiker, malgre sa, nou annan serten re-alokasyon bidzeter ki bezwen ganny fer, e Gouvernman pe fer en demann pour en Bidze Siplemanter an akor avek Seksyon 154(6) nou Konstitisyon, pour en sonm SR 275,506,848.63. Sa, pe ganny finanse par en rediksyon dan depans dan bidze, pour en sonm SR 621,370,992.77.

Sa, i fer Msye Spiker, ki ozordi mon pe prezant avek sa Lasanble en rediksyon SR 345,864,144.14, dan bidze 2023.

Msye Spiker avek sa, mon pou pas an revi lo bann demann adisyonnèl ki Gouvernman pe demande.

Anba saler, en sonm SR 4.3 milyon ki relye avek sipor adisyonnèl pour Komisyon Laverite e Rekonsilyasyon Nasyonal ki son manda ti ganny prolonze, e osi re-alokasyon pou kouver bann travayer ki ti sipoze bouz anba nouvo Lotorite Kominikasyon e osi transfer bann travayer ki sorti anba Komisyon Nasyonal pou Sida ki'n nepli ekziste, pou al anba Lotorite Lasante Piblik.

Par kont, en total SR 106.3 milyon anba saler bann Minister, Departman e Lazans pe ganny koupe e osi SR 19.3 milyon anba sa ki nou apel "other wages".

Msye Spiker, dan 'Goods and Services' en sonm SR 56.4 milyon pe ganny rekonmande pou kouver depans anplis pour sa lannen. Bann antite ki annan pli gran alokasyon anba sa kategori se Departman Lagrikiltir pou kouver sibvansyon lo manze zannimo ki'n ganny

prolonze ziska sa mwan, Lazans Transpor lo Later (SLTA), e Komisyon Anti Koripsyon.

Parkont anba ‘Goods and Services’ nou pe osi fer en ‘rediksyon bidzeter SR 26.2 milyon dan bann diferan Minister, Departman e Lazans e SR 4 milyon anba bann Lezot “Goods and Services”.

Dan Proze Kapital, en sonm SR 197.6 milyon pe ganny rekonmande koman bidze adisyonnèl e en sonm SR 324 milyon koman rediksyon bidzeter. Sa rediksyon i akòz bann proze ki swa pa pou konplete an 2023, oubyen ki pa pou materyalize sa lannen. Mazonite, sa bann proze fòdre dir i bann proze finansè par bann don e bann pret, e osi revizyon dan to lesanz.

Msye Spiker, en sonm SR 137.6 milyon rediksyon bidzeter pe ganny propoze anba sa ki nou apel ‘Net Lending’ e sa i dapre egzekisyon proze anba PUC e osi anvè diferans dan to lesanz.

Msye spiker finalman, en sonm SR 17.2 milyon anba bann proze devlopman, prensipalman pou kouven depans anba SPTC relye avèk akizisyon bann bis. Sa i rezilta serten retar kot serten peyman pann ganny fer an 2022 e sa i annan en lenpak lo bidze sa lannen. I osi enkli, SR 2.8 milyon pour lenstiti “Guy Morel” pou serten louvraz renovasyon ki ase enportan.

Msye Spiker, lo kote Det Gouvernman, a la fen Zen 2023, nou det total i; SR17.7 bilyon ouswa 63.9 pousan GDP, konpare avèk la fen 2022 kot nou det ti SR 18 bilyon ouswa 62.7 pousan GDP. Nou pe prozèkte ki ver lafen lannen, det pou ariv SR 18.6 bilyon ouswa 62 pousan GDP. Msye Spiker, Det Gouvernman i reste lo en trazektwar soutenab.

Msye Spiker baze lo performans premye sis mwan e negosyasyon avèk IMF nou pe prevwar ki nou pou fer en defisit fiskal primer SR 70.98 milyon ouswa 0.24 pousan nou GDP pour sa lannen.

Msye Spiker, avek sa, mon demann sipor bann manm, ler mosyon lo Bidze Siplemanter i ava ganny anmennen devan Lasanble Nasyonal pour zot laprouvasyon.

Msye Spiker, avek ou permisyon mon a demann bann teknisyen Minister Finans pou fer en prezantasyon lo sa bidze siplemanter e apre nou a reponn okenn kestyon bann manm.

Mersi bokou Msye Spiker.